

四庫全書

史部

欽定四庫全書

平定準噶爾方略正編卷十七

乾隆二十年秋八月癸亥

諭將軍班第等籌辦準噶爾生計

上諭軍機大臣曰準噶爾數年以來諸部互相殘殺
久失生業甚屬困窮朕統一寰區不忍坐視特命
大軍平定伊犁救生靈於塗炭今聞各部落人等
貧困者多若不加籌畫必至阡危朕心深為軫卹

因思有無相濟貧富相通各部落中自可通融辦理將軍班第薩喇爾叅贊大臣鄂容安其飭交諸部台吉宰桑等據實查明極貧戶口勸諭富人共相養贍尚恐難於接濟著將西路運到官茶四萬封班第等酌量賞給貧戶或賞給養贍貧戶之家務宜確查徧給俾其實沾恩澤仍諭台吉宰桑等嗣後董率所屬各勤耕牧如有盜竊攘奪等事嚴行禁止若仍踵舊習即照律辦理將此通行曉諭

至各台吉宰桑亦宜體朕撫綏準部至意善為教
養以期生計日豐盜賊永息勉之母怠

申諭辦理準噶爾事宜

上諭軍機大臣曰據班第等奏布庫努特舊宰桑敦
多克汪沁密告薩喇爾云阿睦爾撒納入覲之心
似屬猶豫或半途復返或遣納默庫班珠爾等將
伊家口遷移俱未可定已密行烏里雅蘇台駐劄
大臣留心防範等語所見甚是昨納穆扎爾照阿

睦爾撒納宰桑等所請遷移游牧朕即傳諭莫爾
渾等留心防範至阿睦爾撒納中途逗留或別生
事端班第等即遵節次諭旨相機辦理又奏稱明
阿特部落二千餘戶原係阿爾台居住之烏梁海
從前被準夷威劫令其防守北界今願移歸舊游
牧若照伊所請將來辦理阿睦爾撒納游牧時可
與噶爾藏多爾濟哈薩克錫喇等兵丁一同遣往
等語其事尚屬可行但阿睦爾撒納雖有罪應誅

其游牧人衆毋庸驚擾誠恐明噶特等肆意搶掠
非所以示體卹仍遵前旨傳諭伊游牧人衆照舊
安居選派喀喇巴圖魯阿玉錫等大員管轄并嚴
禁搶掠惟將阿睦爾撒納從前貪取之物查出酌
量分賞明噶特人衆方為妥協至敦多克汪沁舊
係布庫努特宰桑若伊游牧人衆羣相推服即給
還原職其侍衛吞圖布侯有別鄂拓克宰桑缺出
補授班第查明具奏請旨再土爾扈特台吉巴圖

爾烏巴什告稱達瓦齊將伊屬人分散懇請會合
游牧等語班第等應查明辦理并將似此分散者
一體查出應如何辦理之處酌定奏聞並將此傳
諭莫爾渾阿蘭泰舒赫德等將敦多克汪沁所告
之處加意防範毋得稍忽

甲子

申諭駐劄烏里雅蘇台辦事大臣莫爾渾等防範阿
睦爾撒納遷移游牧

上諭軍機大臣曰朕前降諭旨俟阿睦爾撒納前來擒治後再將伊扎卜堪游牧人衆辦理今詳察情形前來與否俱未可定若既不前來又將伊扎卜堪游牧人衆遷至塔爾巴噶台一處會合則必挈之潛逃不可不預為防範著速傳諭莫爾渾等阿睦爾撒納如抵烏里雅蘇台逗留時藉稱遷移游牧之後再行入覲則莫爾渾等當以未奉朕旨不敢擅許為詞如或抗違即帶兵辦理倘坐視遷移

致成大釁朕必重治其罪計此時阿蘭泰亦已到
彼其會同密議相機果斷一得信息即速奏聞

乙丑

命鑄給管理巴里坤大臣印信

上諭大學士曰策楞已賞給都統職銜令駐劄巴里
坤辦理事務著鑄給管理巴里坤等處官兵大臣
印以昭信守

丙寅

密諭派員管理阿睦爾撒納游牧

上諭軍機大臣曰朕昨密諭哈達哈俟辦理阿睦爾撒納後其游牧人衆於策凌屬下宰桑內揀選數人管理繼思喀喇巴圖魯阿玉錫素習夷情受恩最久故特派伊前往管理扎卜堪游牧但此時即行諭知阿玉錫恐有洩漏著先傳諭哈達哈等俟阿玉錫到彼將此旨傳諭仍候諭旨到時即帶兵會同納穆扎爾將阿睦爾撒納黨惡宰桑烏巴什

錫哈瑪和通烏勒木濟巴圖濟爾噶爾巴桑策凌
阿穆爾濟爾噶勒們都巴桑及在逃之固穆扎卜
等擒拿緝獲其餘宰桑俱不必辦理仍傳諭伊等
以阿睦爾撒納負恩悖逆烏巴什等同惡相濟是
以擒治與爾等無涉宜照常管領戶口安居樂業
永為國家臣僕令阿玉錫等善為撫綏慰諭再班
第等奏班珠爾負恩怙勢遷延入覲自應一併治
罪伊所屬宰桑無多非阿睦爾撒納黨羽可比應

毋庸辦理併將納噶查普爾普屬人俱著阿玉錫
管轄其扎木叅齊木庫爾屬人毋得任其逃竄加
意防守候朕旨遵行或因游牧人衆阿玉錫不能
獨管即暫派侍衛協辦朕仍遣人相助哈達哈等
與阿玉錫其悉心會商相機辦理尤宜周詳慎密
毋得稍有洩漏

丁卯

諭辦理接濟降人口糧事宜

上諭軍機大臣曰班第等奏阿睦爾撒納咨稱伊奴
集屬下人衆五千餘戶俱多窮困請將接濟官兵
所剩羊萬餘隻指伊俸銀扣抵售買班第等恐其
借端生事致悞行期酌將一半截留候奏請賞給
所辦尚合機宜但阿睦爾撒納屬人安得有五千
餘戶之多明係從各部搶掠俟將伊治罪後遵照
前旨分別給主歸公其餘仍派員管轄又奏稱塔
爾巴哈沁台吉額林沁多羅特台吉舍楞等自哈

薩克逃出被追兵搶奪所有戶口二千餘戶口糧
牲隻俱乏係阿睦爾撒納同族兄弟阿睦爾撒納
遣額林沁之弟納咱爾舍楞之弟諾爾布來請接
濟口糧請暫於額林哈畢爾噶屯耕種石內計口
授食並於塔本集賽及額林哈畢爾噶等鄂拓克
各派羊隻并將官茶二千封運往接濟俾在和博
克薩里烏隆古等處居住等語此等投降戶口自
應酌量接濟若由內地運往口糧接濟伊等則斷

乎不可班第等辦理尚屬妥協此等人內有應給
與職銜者即行具奏請旨

戊辰

駐劄烏里雅蘇台辦事大臣莫爾渾等疏奏郡
王青滾雜卜收服汗哈屯等處烏梁海部衆

莫爾渾等奏言據叅贊大臣喀爾喀副將軍郡
王青滾雜卜咨稱四月十六日奉

旨會同察達克赤倫前往汗哈屯地方收服烏梁海

等遵於六月初四日起程七月初五日至薩噶
勒巴什嶺先遣副都統敦多卜貝子策卜登等
領兵三百名前赴汗地方收服烏梁海等親領
官兵四百名於初九日抵宰桑哈爾瑪什游牧
阿爾呼特地方傳示

聖主仁慈許其投誠哈爾瑪什等率衆懇降並遣一
等台吉班扎喇克察等傳示得木齊那爾圖四
等台吉丹珠爾等傳示明噶特台吉莽納什即

領兵至察罕烏蘇宣諭

皇仁那爾圖莽納什等俱率衆迎降途中適遇扎薩克齊巴克扎卜根敦等領兵二百名搜緝擅殺卡倫侍衛貝多爾之賊犯等遂會兵前往十五日至巴斯庫斯地方宰桑瑪濟岱等亦懇納降並詢知宰桑那木扎爾住於鄂衣孟保衮住於薩穆勒都莽噶拉克住於薩勒扎河布珠庫和齊賴住於哈屯河各地方隨派署叅領阿必達

侍衛多爾濟索諾蘇噶特固穆扎卜等分路傳
示於二十五二十七等日多爾濟阿必達等率
宰桑那木扎爾保衮來降二十九日侍衛索諾
蘇噶特帶領宰桑莽噶拉克來降惟宰桑布珠
庫尚未投誠據稱願隨特楞古特宰桑投見而
特楞古特宰桑那穆克來見時仍未同至現在
嚴飭那穆克等令其帶領布珠庫前來倘不遵
行即用兵收服續據貝子策卜登等呈稱七月

初五日自薩噶勒巴什嶺帶兵前往宰桑敦爾
卓輝來降告知副都統敦多卜業經傳示情願
歸降又據敦多卜傳示汗地方烏梁海宰桑鄂
木布布魯特宰桑根都什特楞古特宰桑瓜齊
楞布魯特和托克布克圖什那穆克等七人俱
率衆降附其查取各宰桑戶口牲隻數目及應
辦事宜俟貝勒策布登扎布到時公同商酌辦
理臣等伏查汗哈屯等處烏梁海俱已收服惟

布珠庫一人未獲現在各處搜緝不日即可弋
獲俟青滾雜卜撤兵時將一應辦理事宜會同
酌議具奏詩

旨奏入報

聞

九月壬申朔

諭尚書公哈達哈辦理阿睦爾撒納事宜

上諭軍機大臣曰朕前命哈達哈以收服烏梁海為

名往辦阿睦爾撒納游牧今青滾雜卜等既將汗
哈屯等處烏梁海收服阿蘭泰亦已抵烏里雅蘇
台阿睦爾撒納自必間知彼處無庸多駐大員致
阿睦爾撒納見而啟疑哈達哈此時若已見阿睦
爾撒納即告知烏梁海業已竣事有旨命同伊入
覲即會同阿睦爾撒納前來如尚未見亦即前往
迎會沿途加意慰諭不得漏洩事機所有傳諭哈
達哈辦理阿睦爾撒納游牧之旨俱著詳密告知

阿蘭泰令其遵照辦理

諭定北將軍班第等辦理古爾班和卓及哈薩克事

宜

上諭軍機大臣曰班第等奏阿睦爾撒納前遣得木
齊特古斯孟克前往古爾班和卓及西部哈薩克
今與伊等使人同至據伊等來文及使人所告請
將塔什罕城內向日駐劄回人阿奇木一員厄魯
特哈爾罕一員不必駐劄查此係策妄阿喇布坦

時相沿舊制今請裁去是有據占塔什罕之意因示以不便准行令其齎捧頒諭哈薩克勅書與前遣之侍衛章武等同往招撫仍令伯什阿噶什之兵沿途防護等語所辦尚合機宜惟哈薩克來文內有聞阿睦爾撒納仍居舊游牧甚為喜悅可復覩噶爾丹策零之時等語此必係阿睦爾撒納隱諱投降受恩之事但以借兵復仇并總統準部為詞從前因阿睦爾撒納離軍營未遠詰問恐致洩

漏今已歷多時自當詳詢特古斯孟克將阿睦爾
撒納遣伊前往時有何言語明白供出班第等未
將曾否詰問之處陳奏殊屬含糊此時特古斯孟
克如尚未遣回阿睦爾撒納處即詳悉詢問具奏
再古爾班和卓來文內稱前避達瓦齊之鋒逃往
彼處今欲來歸恐遇舊日仇人相害乞為保護并
恐哈薩克布魯特邀截等語伊若能親身前來受
其歸順則可若必須救助至與哈薩克等構兵將

來羣起效尤必無休息斷然不可著傳諭班第等知之

癸酉

命恩克博羅特吞圖布為散秩大臣仍授吞圖布為扎爾呼齊宰桑恩克博羅特為墨得齊宰桑

甲戌

綽羅斯台吉鳴爾藏多爾濟和碩特台吉沙克都爾曼濟輝特台吉巴雅爾等入

覲

行在

命賜筵宴

上行圍派噶爾藏多爾濟等分班隨圍行走

喀爾喀親王額林沁多爾濟疏奏阿睦爾撒納
潛逃額林沁多爾濟奏言臣等於七月初十日

自軍營尼楚滾地方起程八月十九日至烏隆
古地方阿睦爾撒納將印信交臣告稱先至游

牧束裝再行入

覲隨帶領扎薩克林丕勒多爾濟喀爾喀章京雅木
丕勒察哈爾喀爾喀兵二十五名及厄魯特兵
三百餘名同行至次日阿睦爾撒納並不經由
正路繞道從額爾齊斯地方逃去沿途搶掠經
各處陸續來報臣當將印信交與王桑寨多爾
濟即於桑寨多爾濟統領兵內揀選索倫兵二
百名喀爾喀兵一百名於二十日起程向額爾

齊斯地方追逐將阿睦爾撒納逃遁緣由報知
將軍班第管領聲援兵副都統扎爾杭阿察哈
爾副都統栢起侍衛薩木都布管轄種地兵丁
護軍統領塔爾瑪善并照管阿睦爾撒納游牧
副都統納穆扎爾及各處卡倫侍衛駐防烏里
雅蘇台大臣奏入

上諭軍機大臣曰額林沁多爾濟奏阿睦爾撒納逃
遁情形甚屬含糊阿睦爾撒納既未逗留於塔爾

巴噶台游牧業已前進離其妻子游牧處不遠何以不挈之同行或搶掠喀爾喀再圖竄逸乃顯將印信交出忽爾遁去此中情形叵測相距甚遠難以揣度著將額林沁多爾濟奏摺抄寄班第等閱看從前伊等奏阿睦爾撒納情事朕已節次降旨訓諭此時班第等若得伊逋逃信息即遵照前旨相機辦理仍將所得信息及如何辦理之處速行奏聞

是日

上駐蹕扎克丹鄂佛洛

命軍機大臣帶領宰桑厄爾錐音哈薩克錫喇等入

見行幄

詢問準噶爾地方情形隨

命侍郎玉保等帶領厄爾錐音哈薩克錫喇及散秩

大臣恩克博羅特吞圖布等前赴西路軍營聽

候調遣賞厄爾錐音哈薩克錫喇銀各三百兩

恩克博羅特吞圖布銀各二百兩並

命郡王扎拉豐阿同往軍營辦事

乙亥

命傳

旨獎諭貝勒齊木庫爾普爾普等

上諭軍機大臣曰據莫爾渾等奏稱貝勒齊木庫爾

普爾普貝子德濟特克什克台吉鄂爾叅等將阿

睦爾撒納私遣至伊游牧之們都及二僕人拏獲

詢知阿睦爾撒納通信游牧人等先行起程伊即
從阿爾台一路來迎等語昨額林沁多爾濟奏報
阿睦爾撒納中途逃遁甚屬含糊朕尚未深信今
伊私遣屬人通信游牧以冀潛逃種種逆跡俱已
敗露實為深負朕恩齊木庫爾普爾普等不顧弟
兄私情將伊所遣之人拏獲送到深明大義實可
嘉予齊木庫爾等所屬戶口仍令伊等自行管轄
俟擒治阿睦爾撒納後即將阿睦爾撒納戶口產

業分別賞給伊等以示鼓勵齊木庫爾普爾普仍俟來京入覲另行加恩著傳諭阿蘭泰等降旨曉諭伊等知之

丙子

定西將軍永常疏奏烏魯木齊接續臺站情形永常奏言八月二十日據侍衛瑪瑞管理烏魯木齊臺站筆帖式達桑阿等報稱在瑪納斯河遇見三處臺站兵丁報稱賊衆百餘人將臺站

搶掠等語瑪瑞等隨即遇見賊衆三百餘人奪路而出現在將運送官茶人等圍住原欲呈報定北將軍因臺站已斷今星夜馳報西路並准總管臺站副都統職銜阿敏道呈報相同臣聞瑪納斯烏蘭烏蘇地方與阿巴噶斯哈丹等游牧相近有流散布庫努特貧人二千餘戶時常盜竊或聞大兵全撤且知臺站兵丁新經更替肆行劫奪但由此至伊犁臺站均闌緊要恐亦

有似此驚擾之處即飭阿敏道接續臺站并行
文定北將軍若臺站已斷即令阿敏道親往台
吉扎那噶爾布等處令其帶兵前往復遣副將
喀爾納帶兵一百名於二十一日前進以為聲
援本日復據侍衛瑪瑞烏魯木齊臺站察哈爾
驍騎校敦多克前來告稱羅克倫一帶三處臺
站亦皆隔絕並稱聞阿睦爾撒納先遣阿巴噶
斯哈丹等領兵前行哨探大兵隨後即到總管

阿敏道聞知此信已將烏魯木齊臺站陸續撤
回等語伏思搶奪賊衆必係蒙古無業貧人斷
無意外之事阿敏道聽信浮言遽行捲撤非急
圖接續不可但臣等已離烏魯木齊十站現駐
木疊地方所帶兵五百名不敷調遣已密行總
管畢里袞將索倫巴爾虎兵丁暫停撤回并遣
人傳知扎哈沁宰桑鄂爾奇木濟同駐劄侍衛
巴哈曼集酌派蒙古索倫等兵接續臺站至烏

魯木齊會同額林哈畢爾噶台吉扎那噶爾布
噶爾藏多爾濟之子諾爾布林沁呼爾瑞台吉
納木奇布魯古特台吉胡達里克等公同進勦
撲滅小醜通信伊犁再索倫巴爾虎撤回兵丁
馬匹未免疲瘦現在於巴里坤牧放馬匹七千
內調取三千換給兵丁前進奏入

上諭軍機大臣曰據永常奏稱阿巴噶斯哈丹等將
西路臺站搶掠奪取官茶等語前班第等將阿巴

噶斯哈丹等與阿睦爾撒納互結黨援謀為不軌
情事曾經奏聞昨額林沁多爾濟又奏阿睦爾撒
納於中途逃遁伊已帶兵追逐今阿巴噶斯等搶
掠臺站官物則伊等黨惡為奸跡已彰著阿睦爾
撒納受朕厚恩盡喪天良謀為叛逆實天理人情
所不容必應擒獲治罪永常此次辦理尚屬勇往
接到此旨即將索倫兵調回帶領前進其各隊撤
回兵丁如有應調者亦即就近調取彼處現既有

馬七千餘匹酌量調用策楞三格等帶領駐防滿洲兵一千名奮勇前進或應勦除或應安撫公同妥協辦理如有必需留待之處占據形勢以待後隊兵至併力進勦現在噶爾藏多爾濟等俱赴熱河入覲恐阿睦爾撒納阿巴噶斯等捏造妄言煽惑伊等游牧人衆特命噶爾藏多爾濟沙克都爾曼濟巴雅爾等寄信曉諭伊等游牧人衆由驛遞寄永常接到日即委委員遞交伊等游牧再伊等

已派出各宰桑等令玉保帶同馳赴軍營噶爾藏
多爾濟等亦不日即令其回至游牧一切應行辦
理事宜已降旨與玉保俟伊到時永常策楞等會
同詳細商酌籌辦永常仍著辦理定西將軍事務
策楞玉保扎拉豐阿俱著在叅贊大臣上行走又
諭曰西路現有應辦之事永常仍令辦理定西將軍
事務所需軍餉著傳諭劉統勳令其將此次軍需
餘存糧石速交恭泰豫為料理妥協俟永常文到

即行應付勿致遲悞

命尚書公哈達哈仍留烏里雅蘇台辦事

上諭軍機大臣曰前已降旨令哈達哈回京今阿睦爾撒納現在潛逃西路復有阿巴噶斯等搶掠臺站之事哈達哈毋庸來京著仍留彼處會同阿蘭泰等辦事其所帶往之根敦扎卜係阿睦爾撒納信用之人斷不可留此旨一到即著於彼處正法

丁丑

駐劄烏里雅蘇台辦事大臣阿蘭泰等疏奏收
獲阿睦爾撒納游牧

阿蘭泰等奏言臣等於八月二十四日間阿睦
爾撒納逃竄之信即飭令普慶帶兵速赴阿睦
爾撒納扎卜堪游牧收其妻子二十五日普慶
領兵至伊游牧先收伊牧廠內馬四百餘匹臣
等於二十六日領兵擬往掩襲阿睦爾撒納之
妻及班珠爾扎木叅遣宰桑等告稱阿睦爾撒

納不能承受

聖主厚恩肆行背叛實未知情今聞官兵前來不勝
驚懼臣等隨令班珠爾及衆台吉同來據阿睦
爾撒納之妻訴稱去歲投誠以來仰沐

皇恩不可勝數阿睦爾撒納悖逆妄行不能承受今情
願帶領我子并班珠爾等入訴

聖主之前所有游牧人衆應否令我子管領出自
天恩並乞將游牧人衆遷至塔米爾等處以防逃竄

臣等領兵暫行駐守防範游牧先將阿睦爾撒
納妻子交待衛富廉等由驛解送並將伊游牧
人衆令其遷至塔米爾等處就近行知舒明辦
理嗣據喀爾喀郡王桑寨多爾濟文稱八月二
十日親王額林沁多爾濟將阿睦爾撒納所交
印信交令守護帶兵行走二十一日至青吉爾
地方遇隨阿睦爾撒納行走之扎薩克林丕勒
多爾濟驍騎校齊克慎藍翎永德伍岱喀爾喀

章京雅木丕勒帶領喀爾喀察哈爾兵二十五
名前來告稱阿睦爾撒納逃遁之後忽將我等
掩襲奮力射賊始得奪路而出適遇阿睦爾撒
納後隊所載軍裝因獲其旗纛盔纓鎖子甲等
物又詢據親王額林沁多爾濟解到阿睦爾撒
納屬人賓巴巴圖爾哈爾察等供稱阿睦爾撒
納潛謀叛逆令長史阿穆爾濟爾噶勒等接取
扎卜堪游牧由哲爾格西喇呼魯蘇哈卜塔克

拜塔克等各處一同逃出如不能全逃止將妻
子帶往又聞令阿巴噶斯之兵搶掠駐劄額林
哈畢爾噶之葉克明安台吉巴雅爾宰桑哈薩
克錫喇游牧令庫圖齊納爾克勒特烏魯特綽
和爾之兵搶掠駐劄伊犁將軍大臣令塔本集
賽噶勒雜特之兵由烏隆古路搶掠撤回各兵
及聲援兵丁等語續又擒獲阿睦爾撒納屬人
鄂立丹津二名查丹津即前遣通使哈薩克之

人俱供實不知情因速行將軍班第及卡倫各侍衛等隨帶兵由烏英齊一路前赴烏蘭庫圖爾堵截并行知後隊帶領察哈爾兵丁侍衛官員前往索爾畢烏拉克沁等嶺堵截奏入

上諭軍機大臣曰阿蘭泰等奏稱已將阿睦爾撒納妻子及班珠爾等收獲派侍衛富庶等解送來京並派兵將伊游牧人衆遷至塔米爾等處等語阿睦爾撒納妻子等即飭侍衛等中途小心管解速

行來京至伊等所奏阿睦爾撒納之妻並不聽從
潛逃此特見我兵已至無可逃遁故為此飾詞豈
可憑信如果誠心不肯潛逃則阿睦爾撒納之說
計伊妻早已聞知何不先行陳訴著將此情節另
行詳悉具奏阿睦爾撒納游牧人衆不特不宜仍
在原處居住即遷至塔米爾鄂爾昆等處尚屬未
協從前曾令查勘通肯呼裕爾地方為安置伊等
游牧之地即著哈達哈阿蘭泰等將阿睦爾撒納

游牧人衆馬駝器械盡行收取惟留口糧羊隻派出兵丁嚴行防護移至通肯呼裕爾安置俟齊木庫爾等入覲後察其情形即將阿睦爾撒納人等令其管轄所獲阿睦爾撒納遣回游牧之們都等審訊明白即在彼處正法或於烏里雅蘇台地方嚴行看守俟擒獲阿逆時一同獻俘阿蘭泰等現將滿洲索倫兵丁暫在扎卜堪駐劄俟游牧遷定後令在庫克嶺那木嶺二處防守此項兵丁與其

在彼二處防守不若接應額林沁多爾濟併力前進更為有益然或相離已遠或馬力不足著阿蘭泰等查明奏聞阿睦爾撒納逃竄後額林沁多爾濟即領兵前進擒拏自易且伊屬下人怨恨者多心已離散阿蘭泰等應遣人知會額林沁多爾濟設法曉諭阿睦爾撒納所屬人等令其自行擒獻永受重恩伊屬下人等必自內生變逸賊更易弋獲將此詳悉傳諭阿蘭泰等遵照辦理

臣等謹案阿睦爾撒納逆萌已露屢蒙

降旨將軍大臣密速籌辦而司事者以因循坐失事

機不克仰副

指授以致免脫遠颺其時逆黨猶依巢穴阿睦爾撒
納早蓄異志計必潛通游牧挈致同逃復蒙

我

皇上密勅諸路豫事防範蓋以賊巢不傾非特無以
正助逆之罪且令羽翼游魂假息尤足煽動

滋事殊失操刀必割之義觀於被弑時逆妻
以陳訴表異其言固不足信即普爾普等聞
通信而自首亦明知軍營部署已定勢難與
阿逆首尾相應不得已為急圖卸罪計耳伏
讀

聖諭於鬼域前後情形一一瞭如指掌是以一舉而
黨惡悉就網羅非諸臣僅僅請移游牧者所
能窺見萬一也

定西將軍永常疏奏諾爾布林沁來投情形

永常奏言八月二十四日羅克倫臺站章京三
扎卜喀爾喀章京齊爾們稟稱據布魯爾通格
臺站之齊巴克告稱遇賊百餘人被傷脫出至
噶爾藏多爾濟之子諾爾布林沁游牧告知隨
帶兵二百名防禦途遇厄魯特五人詢係扎那
噶爾布所屬聞扎那噶爾布已與阿巴噶斯哈
丹班珠爾普爾普等會兵搶掠臺站阿睦爾撒

納領兵直犯伊犁並欲騷擾巴里坤地方我等
回至特訥格爾遇諾爾布林沁攜眷屬內投告
稱有布魯古特百餘人搶掠游牧是以遷移前
來求轉達將軍另行安置等語臣伏思阿睦爾
撒納及新降台吉宰桑等現在入

覲何至忽生變亂必係布庫努特之人託名煽動但
諾爾布林沁係額林哈畢爾噶大台吉挈眷來
投甚屬可疑臣一面傳知烏里雅蘇台大臣偵

探阿睦爾撒納蹤跡復傳知駐劄巴里坤大臣
策楞等將未過巴里坤之撤回兵丁暫行停止
仍飭副將喀爾納接應諾爾布林沁前來奏入
報

聞

己卯

諭駐劄烏里雅蘇台辦事大臣阿蘭泰等派兵擒拏
阿睦爾撒納及接續臺站各事宜

上諭軍機大臣曰覽阿蘭泰等屢次奏摺竟以交辦
阿睦爾撒納游牧一節無誤即可苟安無事如所
奏第四十站以往臺路斷絕已行文將軍班第轉
飭臺站章京永泰速為辦理等語所稱行文班第
之語甚屬糊塗現在臺站已斷作何傳送著即明
白回奏伊等尚未知西路阿巴噶斯等搶掠臺站
之事著將永常所奏抄寄伊等閱看又如接濟額
林沁多爾濟追擒阿睦爾撒納之處竟全不置議

夫桑寨多爾濟一少年耳尚能出兵分路堵截伊等身為大臣何至一籌莫展著傳諭哈達哈阿蘭泰於撤回索倫察哈爾兵丁內如何調遣接濟額林沁多爾濟之力并通信班第作速籌畫辦理再瑪木特之孫扎木禪人尚可用或令伊揀選扎哈沁兵丁前驅偵探或於伊等內揀選熟悉道路之人徑達伊犁通知班第等協力相助一面辦理一面將現在情形及陸續信息即行奏聞

諭叅贊大臣玉保等詢問各宰桑等進兵事宜

上諭軍機大臣曰永常奏摺可即抄寄玉保等給與同行各宰桑等閱看奏內所稱阿睦爾撒納領兵直犯伊犁及班珠爾普爾普搶掠臺站之言顯係虛捏但伊等意見如何阿睦爾撒納現在情形果能直抵伊犁生事與否大兵或宜速進或俟明年整頓前行方為有益將伊等意見告知玉保等轉行陳奏再伊等前赴軍營由阿濟必濟一路前往

此時情形恐中途與賊相遇衆寡不敵殊屬未便
著由烏里雅蘇台帶兵一二百名同行更為妥協
若不便取道阿濟必濟即就近進口由內地前往
雖較遲數日亦屬無礙並著詢明商酌具奏

命傳

諭台吉扎那噶爾布

上諭軍機大臣曰永常奏阿巴噶斯哈丹帶兵搶掠
扎那噶爾布游牧扎那噶爾布因力弱不能抗拒

勉為服從等語是其心本無他情非得已朕已洞悉著傳諭扎那噶爾布此時但約束游牧整頓兵力以待大兵前進共殲逆賊毋致驚惶擾亂事定後自當永受殊恩若扎那噶爾布果能奮力自拔即束身歸命倘或不能惟宜安靜自守斷不得因已同阿巴噶斯等形迹交通妄生疑懼致貽後悔著詳悉曉諭知之

庚辰

諭駐劄烏里雅蘇台辦事大臣阿蘭泰等辦理包沁
及追捕阿睦爾撒納事宜

上諭軍機大臣曰阿蘭泰等奏包沁總管阿克珠勒
於八月二十九日回至游牧殺傷官兵已遣總管
鄂博什帶索倫兵丁追緝包沁人衆并將烏里雅
蘇台兵丁分駐各隘口等語所辦尚合機宜仍速
行文鄂博什追及包沁人衆時諭以黨同阿睦爾
撒納係阿克珠勒一人所為餘皆被其脅從不相

株累前阿克珠勒入覲時朕即疑其人狡猾難信擒
獲時務訊明情節即在本處正法將家口一併處
斬仍於得木齊內揀選一人授為宰桑管理游牧
又從前納噶查曾將阿睦爾撒納與阿巴噶斯等
逆謀告知將軍班第今已束身來歸誠意可嘉伊
兵力甚弱著傳諭令其速赴熱河或即令整兵前
進或於明年帶兵追捕阿睦爾撒納至時另行商
辦至齊木庫爾先曾擒送阿睦爾撒納所遣之們

都今又由烏蘭庫圖爾接出游牧并指陳應行防
守堵截各事宜甚屬可嘉仍遵朕旨前來入覲
再阿睦爾撒納有搶掠喀爾喀之信雖未足憑但
伊游牧相離甚近平日頗悉喀爾喀情形或迫脅
扎哈沁包沁人等驚擾喀爾喀亦未可定哈達哈
阿蘭泰等務宜加意豫備計惟速將伊游牧內移
沿途嚴密防護方為妥協阿蘭泰等現議令青滾
雜卜帶領新舊烏梁海堵截賊來要路即傳諭青

滾雜卜帶伊所轄兵丁會同察達克赤倫等烏梁
海兵丁協助額林沁多爾濟仍諭察達克受朕重
恩又與阿睦爾撒納舊有仇隙益宜奮勉務期擒
獲逸賊並傳諭現在進兵人等與賊相遇各宜奮
勇爭先丕振軍威如能擒獲首惡其功更大必加
格外殊恩以示鼓勵

命傳

諭阿睦爾撒納

上諭阿睦爾撒納曰爾上年受困達瓦齊率領妻子
游牧前來歸命朕錫以王封資之生計且推誠倚
任用為將軍較來降之諸台吉獨加寵渥皆衆人
所共知者昨額林沁多爾濟奏爾至烏隆古地方
忽行逃竄朕初尚不信以為受恩深重何反覆至
此今據各處奏報僉同實出意料之外揆厥所由
必因在軍營時與班第薩喇爾等意見不和恐其
叅奏自生猜疑耳爾等意見叅差之處朕已洞悉

意俟爾入覲時詢問明確果無大故自示含容乃
不避負恩背義之名輒爾逋逃狂愚實甚爾意以
為別娶妻室糾集黨羽從前妻孥游牧即可不顧
今爾游牧自妻子至部衆無不以爾受朕深恩自
作不靖若非朕曲加仁慈俱因爾株累至於殲滅
共相怨恨即爾累及妻孥猶屬細事至所屬人等
積勞戰陣今又計日危亡爾固不顧妻孥此等誰
無父母兄弟妻子終身隔絕豈人人盡如爾意耶

爾受朕恩如此尚懷叵測爾之屬人受爾恩幾何能終保其不生他變耶爾若逃往哈薩克爾前遣通使之丹津云爾兄巴特瑪車凌在彼乞食爾即逃往能如歸命天朝之受恩寵渥耶况哈薩克來使曾云爾等全不可信久相猜貳即往亦未必容留彼時進退無措朕雖欲施恩曲宥其如國法何爾當詳細籌畫仍悔罪乞恩朕自念爾前勞曲為寬貸若執迷不悟朕命將興師窮搜極捕一被弋

獲天網難逃今特不忍爾自罹罪愆且令爾部衆
不得安生是以不惜降旨詳悉訓諭爾思達瓦齊
係綽羅斯大族據有伊犁朕大兵所指未敢稍撐
螳臂俯首就縛爾與達瓦齊勢力相較何如即令
暫收四衛喇特不過一時烏合各欲相機觀變旦
夕立見瓦解爾特不知覺悟耳其熟計利害無貽
後悔又

諭哈達哈等曰現在拏獲阿睦爾撒納宰桑七員除

阿穆爾濟爾噶爾外選一庸愚無用之人不必解
送來京令其齎曉諭阿睦爾撒納之旨前往尋遇
阿逆時給伊閱看仍用托忒字多為繕寫交與額
林沁多爾濟令其廣為宣布

辛巳

命協辦陝甘總督劉統勳籌辦馬駝

上諭軍機大臣曰劉統勳現在巴里坤所辦駐兵之
事尚可稍緩現今阿睦爾撒納尚未擒獲大兵須

由西路前進馬駝最關緊要著傳諭該督令其回
至肅州密速籌辦即將現存營馬加意喂養約計
足供五六千人乘騎之用如有不敷即隨便購買
其價不必拘泥成例但期籌畫無悞聽候今冬調
遣并將辦理情形速行陳奏

平定準噶爾方略正編卷十七

欽定四庫全書

平定準噶爾方略正編卷十八

乾隆二十年秋九月壬午

諭叅贊大臣哈達哈等安撫齊木庫爾游牧

上諭軍機大臣曰額林沁多爾濟奏齊木庫爾於阿

睦爾撒納未逃之先將伊欲叛情形告知甚屬可

嘉著傳諭哈達哈阿蘭泰不必將伊游牧遷移仍

令安居原處候朕降旨

諭叅贊大臣哈達哈等通使哈薩克事宜

上諭軍機大臣曰據額林沁多爾濟等奏報阿睦爾
撒納逃竄追捕無蹤看來伊必至哈爾巴噶台游
牧否則徑投哈薩克今詢問噶爾藏多爾濟據稱
自汗哈屯等處取道至哈薩克甚近彼處現有伊
所屬之烏梁海等因遣伊宰桑固穆扎卜交侍衛
德善帶往哈達哈等奉到諭旨著派副管旗章京
職銜莫尼扎卜同往傳諭哈薩克阿布賚云爾所

遣使臣額穆爾巴圖魯來見定北將軍時已將爾
恭順之意奏聞大皇帝甚為嘉悅俟來使入覲後
正欲加恩詎意阿睦爾撒納潛謀叛逆將來使遣
回且於入覲時中途逃竄伊去年受困於達瓦齊
窮極來歸所受大恩不可勝數乃心懷反覆欲總
統準部恃我威力殘擾隣近諸部落正與爾來使
所云厄魯特人全不可信之語適相符合今已傳
知各路堵截追擒自當弋獲如追捕甚急竄入爾

境內果能即行擒送大皇帝必重加恩賞否則潛
蹤日久為我師所覺徑入擒勦恐爾境內人等不
無驚擾如此明白宣示看阿布賚情形若何哈達
哈等候固穆扎卜莫尼扎卜到彼傳諭及歸途信
息速行奏聞再烏梁海赤倫如情願同往亦令其
隨往

命賞給準噶爾台吉噶爾藏多爾濟等銀兩有差

上諭軍機大臣曰此次入覲之綽羅斯台吉噶爾藏

多爾濟和碩特台吉沙克都爾曼濟輝特台吉巴
雅爾著加恩各賞銀五千兩台吉和通額默根達
瓦布魯爾各賞銀一千五百兩台吉巴泰曼集鄂
勒椿達克巴羅卜藏巴顏察罕吹扎卜鄂諾什本
塔什索諾木丹津各賞銀一千兩閒散台吉和通
鄂勤策凌烏巴什琿齊衮布宰桑厄爾錐音哈薩
克錫喇各賞銀三百兩普濟普賞銀一百二十兩
管旗章京各賞銀一百兩副管旗章京各賞銀八

十兩閭散宰桑各賞銀六十兩僕人各賞銀十兩
厄爾錐音等僕人亦各賞銀十兩策凌訥默庫去
年曾賞給銀兩今來入覲著再加恩賞策凌銀三
千兩訥默庫銀二千兩

癸未

上御避暑山莊澹泊敬誠殿受噶爾藏多爾濟沙克
都爾曼濟巴雅爾等朝

詔封台吉宰桑等爵秩有差

奉

天承運

皇帝詔曰準噶爾部落人等互相殘殺羣遭塗炭不
獲安生朕統一寰區不忍坐視特發兩路大兵進
討各台吉管理鄂拓克宰桑等畏威懷德率屬來
歸從軍自効今已平定伊犁擒獲達瓦齊是用廣
沛仁恩酬庸錫爵準噶爾舊有四衛喇特今即仍
其部落樹之君長噶爾藏多爾濟封為綽羅斯汗

策凌封為都爾伯特汗沙克都爾扎卜封為和碩
特汗巴雅爾封為輝特汗台吉和通額默根達瓦
布魯爾封為公台吉巴泰曼集鄂勒椿達克巴授
為扎薩克一等台吉羅卜藏巴顏察罕吹扎卜鄂
諾什本塔什索諾木丹津諾爾布授為扎薩克職
銜將伊等授為扎薩克及所屬編次旗分佐領之
處該部察例具奏宰桑厄爾錕音哈薩克錫喇俱
授為內大臣辦理圖什墨勒事務厄爾錕音仍管

喀喇沁鄂拓克哈薩克錫喇仍管噶勒雜特鄂拓
克宰桑拉蘇隆達什策凌鄂哲特都噶爾鄂勒錐
俱授為散秩大臣仍管各鄂拓克噶爾藏多爾濟
等及管理鄂拓克之宰桑厄爾錐音等受朕深恩
其董率所屬各勤教養共圖生聚爾等如恪遵朕
訓自永受無窮之福欽哉毋怠

命封喀爾喀郡王桑寨多爾濟為親王

上諭軍機大臣曰喀爾喀郡王桑寨多爾濟此次軍

營行走甚屬奮勉伊祖丹津多爾濟原係親王著
加恩晉封柔寨多爾濟為親王以示優眷

命押解阿睦爾撒納宰桑阿穆爾濟爾噶爾來京

上諭軍機大臣曰據阿蘭泰等詢問阿睦爾撒納宰

桑阿穆爾濟爾噶爾供詞薩喇爾叅奏阿睦爾撒

納之處瑪木特屬人曾經洩漏等語此雖未知虛

實然亦當密加防範至所供阿睦爾撒納在察罕

扎輝或烏蘭庫圖爾等候命所遣之人由哲爾格

西喇呼魯蘇地方帶游牧前往等語阿睦爾撒納
逃竄自應遇我沿途聲援及屯田兵丁若迎伊游
牧必為額林沁多爾濟追及今俱未相值究從何
路潛逃著哈達哈等速遣妥員赴額林沁多爾濟
處查明具奏再吞圖布思克博羅特僕役財物前
為阿睦爾撒納所掠著速行查出俟伊等至烏里
雅蘇台時先為告知事定之後即行賞給至阿穆
爾濟爾噶爾係阿睦爾撒納親信之人今阿蘭泰

等訊伊供詞俱含糊不明著即遵前旨押解阿穆爾濟爾噶爾來京中途務嚴飭押解人員毋得令其脫逃至阿睦爾撒納之子斷不可留著即解赴京師阿睦爾撒納之妻係納默庫之姊伊二女已降旨賞與訥默庫哈達哈等並即遵旨辦理

甲申

訓飭定西將軍永常等

上諭軍機大臣曰永常奏傳喚扎哈沁宰桑鄂爾奇

木濟托故不至情形可疑已密行阿敏道喀爾納
等令其酌量兵力擒拏等語鄂爾奇木濟係朕念
伊兄敦多克身故加恩授職之人若果懷二心自
難寬貸今授普爾普為散秩大臣扎哈沁宰桑交
副都統額爾登額侍衛端濟布等帶往相機擒勦
俟擒獲鄂爾奇木濟即交端濟布解送來京又將
宰桑厄爾錕音哈薩克錫喇吞圖布思克博羅特
等送回游牧整兵前進永常即傳諭哈薩克錫喇

之弟塔斌令其豫為整備俟伊兄一到即協力前進勦捕又奏阿睦爾撒納現在逃叛恐搶掠巴里坤現候阿敏道等接續臺站信到即從木壘退回巴里坤防守是竟置班第等於度外甚屬錯謬巴里坤即須防守可留三格辦理永常策楞應整頓兵力作速前進遇阿巴噶斯哈丹之衆務行勦滅三格若亦隨軍前往即著派豆斌就近調取綠旗兵二三千名防守巴里坤至巴哈曼集將游牧移

於克什圖自係避賊豈有從亂而反內移之理永
常不辨虛實存心畏怯辦理種種未協此旨接到
即同策楞奮勇前進毋得仍蹈舊轍慎之

命侍郎雅爾哈善前赴軍營

上諭軍機大臣曰阿蘭泰等奏稱聞阿睦爾撒納現
擬糾合叛黨接出游牧並搶掠喀爾喀等語此特
虛張聲勢伊不但無此力量即實有之當乘其未
集擊之甚易觀伊等奏報未免心存畏懼朕今命

雅爾哈善前赴軍營會同達爾黨阿哈達哈阿蘭
泰共商議進兵著達爾黨阿雅爾哈善前進哈達
哈阿蘭泰續往兆惠舒赫德即著在烏里雅蘇台
軍營辦事布拉罕察罕托輝地方甚近哈達哈等
接得此旨即派扎爾杭阿帶現領兵丁一千名同
溫布前往布拉罕察罕托輝等處追捕阿睦爾撒
納若馬力不足即用阿睦爾撒納游牧馬匹或暫
派齊末庫爾等游牧之馬亦可再青滾雜卜察達

克圖倫楚等前往汗哈屯地方何以不即遣伊等
從彼處追捕阿睦爾撒納如遇阿逆即行擒獲否
則仍同扎爾杭阿會商勦捕

命侍衛濟福等傳

諭宰桑厄爾錐音等派兵前往伊犁

上諭軍機大臣曰永常奏哈薩克錫喇之弟塔斌遣
人來告現在派兵防守游牧等語看來塔斌並未
煽動伊游牧既有兵力濟福烏爾登可傳諭厄爾

錐音哈薩克錫喇思克博羅特吞圖布等同至噶勒雜特游牧將伊等兵丁挑選帶進伊犁沿途勦捕若北路現在難行或由口內沿邊速往或自烏里雅蘇台帶兵從西路前去亦可濟福烏爾登與伊等議定前往仍速行奏聞

命喀爾喀親王額林沁多爾濟帶領齊木庫爾等赴熱河行在

上諭軍機大臣曰額林沁多爾濟原同阿睦爾撒納

及齊木庫爾德濟特普爾普納噶查等前來入覲
今阿逆業已逃竄額林沁多爾濟雖領兵追擒量
亦無濟著即帶齊木庫爾等小心防範速赴熱河

乙酉

命副都統富德送台吉噶爾藏多爾濟等前赴軍營
在領隊大臣上行走

申諭協辦陝甘總督劉統勳籌辦馬駝

上諭軍機大臣曰前經屢諭劉統勳回至肅州辦理

馬駝計已奉到今據奏現有兵丁三千四百名擬以一千四百名防守巴里坤二千名聽候永常調遣等語巴里坤無須多兵防守已傳諭策楞約存兵四五百名餘俱令其前進其馬匹僅二千六百有餘亟應籌畫務宜悉心辦理俾馬力充裕足應疾驅方為妥協

定西安將軍永常疏奏領兵自木壘退駐烏爾圖布扎克

永常奏言現在額林哈畢爾噶烏魯木齊等處
台吉宰桑等俱已煽動斷絕臺站搶掠官兵扎
哈沁部落亦懷二心不能保其不叛隨接待衛
蒙固勒呈報將軍班第之文始知阿睦爾撒納
實已叛逆現在軍營馬匹疲瘦駐劄伊等游牧
之內倘有蠢動大損軍威正欲行文策楞調兵
策應并調回阿敏道而濟木薩等臺及喀爾喀
公米什克帶來兵丁俱被搶掠又有布庫努特

得木齊巴圖爾和碩齊等及葉克明安宰桑扎
木叅等忽帶四千餘人前來訴求指給游牧又
屢次傳喚不到之宰桑鄂爾奇木濟亦請將家
屬移於克什圖地方臣伏思此等人衆皆係假
托遷移游牧欲來侵犯且烏蘭烏蘇與克什圖
噶順等處山險路狹倘夾攻我師則歸路斷絕
臣即用言撫慰鄂爾奇木濟等以移營為詞將
伊等帶領行走若有兵邀截即先將伊等誅戮

至九月初五日已至烏爾圖布拉克策楞三格
亦於是日帶兵來會一面將鄂爾奇木濟等遣
回臣受

恩深重未能接續臺站探取伊犁實信不勝惶悚奏
入報

聞

丁丑

命策楞為定西將軍革永常將軍任

上諭軍機大臣曰前因永常聞西路臺站被搶即駐
兵木壘指示辦理尚屬奮勉故加恩仍令辦將軍
事務授為內大臣昨覽伊奏一聞阿睦爾撒納叛
逃即帶兵卻走實屬怯懦不稱將軍之任著革去
內大臣以副都統職銜叅贊効力定西將軍著策
楞補授策楞身負重譴朕加恩復用務宜奮興士
氣揚播軍威不得稍生推諉計此旨到時扎拉豐
阿玉保亦將至軍營策楞速整齊兵馬俟伊等與

帶往之宰桑到時會同商酌擒勦阿巴噶斯哈丹
等領兵直抵伊犁方為合宜觀準噶爾情形雖易
於變亂而我師以寡敵衆奮勇衝擊即驚駭奔散
可詢問帶往宰桑等將背叛之鄂拓克嚴行勦捕
收其馬匹牲隻作為口糧則伊等始知畏懼且可
接濟兵力再據永常奏諾爾布林沁由哈卜塔克
拜塔克前去所關甚要策楞即選派精兵四五十
名前往偵探信息並遵前旨令阿敏道等分作兩

隊速至伊犁取班第等信息即速奏聞再前因永
常奏扎哈沁宰桑鄂爾奇木濟形踪可疑是以授
普爾普為宰桑令侍衛端濟布帶往今觀鄂爾奇
木濟尚無別故著端濟布即將普爾普帶回京師
不必前往

命達爾黨阿為定邊左副將軍

上諭軍機大臣曰定邊左副將軍著達爾黨阿補授
哈達哈阿蘭泰雅爾哈善桑寨多爾濟青滾雜卜

俱著在叅贊大臣上行走青滾雜卜聞與達爾黨
阿阿蘭泰等不協今當用人之際達爾黨阿等務
宜屏除意見和衷共濟著傳諭伊等知之

戊子

命喀喇巴圖魯阿玉錫仍留北路軍營

命授宰桑尼瑪為散秩大臣丹津為頭等侍衛庫綰
喀什哈為三等侍衛賞尼瑪丹津銀各三百兩
庫綰喀什哈銀各一百兩

諭定邊左副將軍達爾黨阿等進兵機宜

上諭軍機大臣曰據哈達哈等屢次奏報俱稱豫備
兵馬並未及前進勦擒通信伊犁各事宜今詢問
解送前來之厄魯特尼瑪丹津伊等言阿睦爾撒
納斷未遠颺必在額米爾鑑格爾等處潛身今年
北路即由阿爾台西路即由額林哈畢爾噶博羅
塔拉進兵夾攻必被擒獲看來丹津人尚明白因
令尼瑪庫綉哈什哈隨噶爾藏多爾濟等往西路

軍營丹津赴北路軍營哈達哈青滾雜卜帶領喀喇巴圖魯阿玉錫丹津選精兵一千名前驅達爾黨阿阿蘭泰等選兵三千名或二千名繼進軍行惟馬駝最要達爾黨阿等儘現在所有馬駝揀選應用並酌派兵丁口糧俟丹津到日即行進兵青滾雜卜前奉命堵截賊衆今奏稱兵糧俱已齊集甚為欣慰伊世受國恩已封為郡王此次若能奮勉必照親王桑寨多爾濟加恩其扎哈沁烏梁海

等懇請接濟口糧已經賞給仍令扎木禪察達克
等選派所屬前行哨探其恩賞照初次進兵減半
支給至阿蘭泰等奏包沁部衆尚未遠去親王成
衮扎布等已豫為堵截若擒獲阿克珠勒等即行
正法餘黨嚴行勦捕將家口賞給桑寨多爾濟青
滾雜卜等以示鼓勵再丹津到時伊等會商兩路
進兵大勢由阿濟必濟通信西路此際策楞等自
必整頓兵力俟噶爾藏多爾濟到時添派游牧兵

丁擒勒阿巴噶斯哈丹追捕阿睦爾撒納以告成
功如伊等仍不竭力辦理即深負朕恩矣勉之毋
怠

叅贊大臣阿蘭泰等疏奏擒獲色沁總管阿克
珠勒

阿蘭泰等奏言臣等前聞色沁人等潛行附逆
逃往布拉罕察罕托輝之信即令鄂博什帶領
索倫兵五百名速行追擊一面令管領聲援及

屯田兵丁之喀爾喀王大臣等并駐防科卜多
布延圖之扎薩克等堵截去路九月初八日據
管領聲援兵丁喀爾喀郡王巴扎爾什第貝子
沙克都爾扎卜公達爾扎等報稱包沁總管阿
克珠勒副總管台拉克等自哈中走逃附阿睦
爾撒納由索勒畢烏拉克沁等嶺過阿爾台於
八月二十九日在布拉罕等處遇見賊衆奮力
截殺當將阿克珠勒擒獲餘衆俱行勦殺其妻

子牲隻盡行收取將副總管台拉克及藍翎和
濟木胡里收楞額額森貝等三人首級同生擒
之阿克珠勒解送前來臣等查色沁部落已經
收服受

恩乃聽阿睦爾撒納煽誘擅殺侍衛兵丁搶奪卡倫
情罪重大俟阿克珠勒解到時應詳訊明確或
即行正法或解京明正典刑恭候

諭旨遵行仍將戶口查明男子成丁者俱行正法所

有妻孥分賞効力之王公大臣官兵以示鼓勵
奏入

上諭軍機大臣曰喀爾喀郡王巴扎爾什第等追勦
色沁叛賊生擒阿克珠勒斬馘台拉克等奮勉可
嘉巴扎爾什第著加恩封為親王貝子沙克都爾
扎卜封為貝勒公達爾扎諾爾布扎卜封為貝子
協理台吉達瑪林封為公其餘奮勉行走官員兵
丁等著哈達哈等查明報部議叙陣亡者亦查明

照例恩卹阿克珠勒即派員嚴行管押來京治罪

庚寅

命扎拉豐阿為定西將軍革永常職拏解來京治罪
上諭大學士曰阿睦爾撒納上年率衆來歸朕加恩
撫納封以王爵伊於召見時面陳略定準夷之策
朕以其才可用爰授定邊左副將軍為我師嚮導
近官軍奏凱朕召諸部台吉齊集熱河將行飲至
之典詎阿睦爾撒納在伊犁軍營時輒以私印調

兵并遣使與哈薩克私通揚言非令伊總統準部
不可種種不法節經班第等奏聞伊心懷叵測揣
知軍前大臣必行參奏不得已赴召前來行至中
途遂將印信交親王額林沁多爾濟托故逃遁潛
遣護衛七人來取家屬伊兄齊木庫爾執使首告
伊妻亦以其負恩逃叛憤激不從願移內地阿睦
爾撒納已為無家之人而竄匿之初乘厄魯特諸
部台吉現俱入覲輒布流言希圖煽惑衆聽搶掠

臺站乃西路各部台吉俱堅心內向有葉克明安
宰桑扎木叅等率所部數千人赴永常處叩請遷
移附近軍營居住以為倚庇乃永常不審虛實疑
為詭計張皇失措挾其宰桑置軍中為質兼程卻
走復恐或躡其後檄行策楞以兵接應并將前遣
安接臺站之副都統阿敏道行文撤回退駐巴里
坤拒守夫阿睦爾撒納負恩逃叛衆部同仇即伊
兄弟妻子亦皆憤恨離心况附和同叛之色沁部

落北路聞信往勦酋首即已就擒部衆殲滅是阿
睦爾撒納了身遁逃無難計日擒戮若當諸台吉
叩轅請告之時永常克振軍威諸部得所依倚厲
兵迅往追捕叛跡其勢甚易何至為浮言驚駭無
端退避使新附寒心士卒沮氣貽悞一至於此且
伊前赴軍營時籌辦諸務率多冒昧即如軍行已
有定站而錯會文移遽令刻日兼程前進兵糧業
經支給猶喋喋以口食不繼為詞希冀邀譽市恩

竟不顧衆心搖惑此類難以枚舉朕是以但飭其
駐烏魯木齊聯絡聲援不使偕衆統兵進發蓋早
知其中無定見全不察事理之輕重也茲當伊犁
久經平定回部率屬歸誠所辦者僅一潛蹤伏莽
之逸賊耳而永常始則未知確實疑係窮夷自相
劫掠奏請追逐意尚近於奮勉迨一聞阿睦爾撒
納在逃之信忽爾畏蕙乖張甘心僨事實出情理
之外若不重治其罪何以任將帥而厲戎行永常

著革職掣解來京治罪定西將軍印務前有旨著
策楞補授今觀策楞竟不能自發一謀自出一慮
惟聽永常妄行調遣恐不能勝將軍之任策楞著
仍在叅贊大臣上行走即日帶兵前往其定西將
軍著扎拉豐阿補授

申諭協辦陝甘總督劉統勳甘肅巡撫吳達善辦理
進勦官兵馬駝口糧

上諭軍機大臣曰吳達善奏劉統勳准永常來札檄

調甘肅綠營官兵援勦所辦甚屬錯謬阿睦爾撒
納係聞軍營大臣叅奏畏罪潛逃豈能遽犯巴里
坤致為邊患試思從前噶爾丹策零時尚不能輕
犯邊境况阿睦爾撒納素為衆惡又復負恩逃竄
人人恨其反覆即伊兄弟妻子亦盡離心以一窮
威亡命何能飛度巴里坤哈密而須盡徵內地綠
旗兵於數千里外為拒守計耶且現據北路官兵
將附和逆賊之包沁首惡就縛黨羽殲除軍威已

振西路兵力不為不敷與其調兵何若勤辦馬駝
口糧應現兵之用劉統勳尚為稍知事體者何一
接永常來信竟不詳加審度惶遽若此定西將軍
已著扎拉豐阿補授著速傳諭劉統勳令其就軍
營現有官兵料理馬駝口糧即日前進如回肅辦
理尚需時日并傳諭吳達善令其就近速為籌備
武調營馬或另行購買其價值不拘成例一面報
知該協督即於甘肅一帶分槽養聽候調遣若

購得臆壯之馬即先行解送軍營又

諭曰劉統勳奏請退駐哈密籌辦進兵事宜甚屬錯
謬朕初不意劉統勳亦張惶失措茫無定識至於
如此葉克明安宰桑扎木叅等久經內屬來求倚
托必無被賊煽誘轉相窺伺之事此特永常望風
疑畏自行驚擾所稱目覩情形者豈果實有確據
耶阿睦爾撒納在此時不過一亡命逸賊耳況素
為諸部所惡人皆切齒其北路同叛之包沁等已

被擒戮馬能一時鼓動諸部飛越數千里至巴里坤此事理所必無者軍營衆心所恃全在領兵大臣今一將軍一總督一都統無端自相驚怖舍木壘而回巴里坤今又議舍巴里坤而就哈密軍心其何所恃劉統勳著嚴行申飭仍令速遵前旨即籌辦馬口糧儘現在兵數或三千或二千尅期進發現已一誤再誤豈容更為猶豫在劉統勳軍務原非所諳但識見乖謬至此實出朕意料之外

此時臺站偶斷只應亟籌安接以通伊犁聲息所
發班第等報匣何至盡行繳回竟漠然置之度外
是何心耶著一併嚴行申飭報匣仍發回

申諭叅贊大臣策楞整兵進剿

上諭軍機大臣曰據永常奏請派兵七八千名進剿
今僅有五千八百餘名先辦理馬駝口糧以利邁
行等語所奏益為迷謬阿睦爾撒納之力斷不能
據有伊犁所依附為惡者不過阿巴噶斯哈丹數

人耳今入覲諸台吉宰桑等俱云四衛喇特多係阿睦爾撒納仇讐前來入覲時即已各飭游牧豫為防範永常聞阿睦爾撒納潛逃即心神擾亂一似賊衆已全收準部非大兵不能恢復者是以將伊拏問著傳諭策楞速整現有之兵相機前進俟扎拉豐阿玉保到時與噶爾藏多爾濟等台吉宰桑會商勦賊通信伊犁至臺站斷絕後發還班第等奏匣永常理應收貯俟接續後仍行發往乃遠

爾繳回是置班第等於度外永常忍心若此實出情理之外若永常策楞在伊犁他人或棄置若此伊能甘心乎永常業經拏問著策楞即派委幹員嚴加看守如或畏罪自戕惟策楞是問

申諭叅贊大臣哈達哈等進兵事宜

上諭軍機大臣曰哈達哈等奏訊問包沁總管阿克珠勒供詞及現在派兵百名令出卡倫收我被截之兵并擒生問信等語阿克珠勒所供哈薩克助

兵一萬與阿巴噶斯哈丹萬人會合搶掠伊犁現
在哈薩克情形何能出兵萬計而阿巴噶斯等戶
口僅及三千阿睦爾撒納游牧業經收獲色沁復
被殲滅安得更有萬人此皆伊等張大其詞以搖
惑衆聽哈達哈等全未度量事機惟過計豫防實
為怯懦至成衮扎布塔爾瑪善俱係堵截賊衆之
兵既未遇阿睦爾撒納即應會兵同來今伊等現
駐何處卡倫外被截者何兵被何人所截奏內均

未聲明如果兵少被截再增派二百人續進今計前至察罕呼濟爾不過一月之程愈速愈合機宜阿蘭泰等即將現有兵丁馬匹通盤計算一面奏聞一面俟阿玉錫丹津到時奮勇前進以期勦滅逆賊此次進兵以休養馬力為要可令每兵一名帶馬四匹多備三四月口糧將汗哈屯烏梁海及收獲各游牧馬匹查明應用如馬力平常即酌量購備勿拘成例仍將班第信息及現辦事宜速行

奏聞

命員外郎唐喀祿護送濟隆胡士克圖前往巴林俟
明年移至伊犁居住

命傳

諭準噶爾部衆

上諭準噶爾部衆曰阿睦爾撒納負恩逃叛造言煽
惑爾厄魯特之衆聞風驚擾莫知適從勢所必有
朕亦不加罪責現在阿睦爾撒納雖潛踪未獲朕

已兩路發兵追捕必被擒獲況聽伊調遣逃遁之
色沁總管阿克珠勒等已為喀爾喀親王巴扎爾
什第等擒勦無遺賊黨愈孤衆所共悉朕前因爾
等連年爭鬪不獲安生特發兩路大兵救民水火
西路之兵未嘗稍有侵擾惟阿睦爾撒納為北路
嚮導恃威凌奪懼罪潛逃今伊妻孥游牧已全行
收獲爾等惟各矢誠心保獲游牧大兵一進派兵
協助若有擒獲阿睦爾撒納者朕必加以重恩特

傳諭兩路游牧人衆知之

甲午

訓飭叅贊大臣哈達哈等

上諭軍機大臣曰哈達哈等奏親王成衮扎布護軍
統領塔爾瑪善領兵擒獲色沁之薩爾坦殺死三
十人逃出十餘人所獲牲隻請分給衆兵充餉等
語此次遇賊雖有斬獲亦因賊少始能若是且尚
有逃者若遇大隊賊衆伊等退避亦未可定即如

軍行馬力疲乏自當更換所獲馬匹追襲何得任
其遁逃成衮扎布等選輓積習朕所素知伊等毋
庸議叙仍著飭行其餘台吉官兵俱著查明報部
議叙從前擒獲阿克珠勒之扎卜及殺賊之阿裕
什巴尼彭楚克等俱著賞銀五十兩收獲牲畜什
物仍照所奏賞給又據薩爾坦供詞有哈薩克錫
喇與噶勒雜特塔本集賽人等共搶掠伊犁之信
現在哈薩克錫喇已經入覲伊弟塔斌又釋我被

獲兵丁與永常通信豈復有搶掠伊犁之事明係賊黨揚言哈達哈等惟據供陳奏似此不經之言皆信以為真而視班第等於膜外伊等即不欲通信班第亦當虛設一詞畫一策何竟置之不論朕思之殊為憤恨且為伊等恥之再班珠爾等乃阿睦爾撒納同黨其妻子屬人俱當賞給功臣但解送需時若賞給此次効力之喀爾喀等能保其不致逃竄否如恐滋事即解送京師亦可至扎拉豐

阿玉保等由阿濟必濟前往西路如須帶兵數百
名哈達哈等即行派往斷不得以北路用兵為詞
著一併傳諭伊等知之

命賞給準噶爾台吉巴桑等銀兩有差

上諭軍機大臣曰此次入覲之台吉巴桑塞卜騰著
加恩各賞銀一千五百兩台吉洪郭爾三濟特特
默齊各賞銀一千兩閒散台吉鄂齊爾宰桑策伯
克博什烏魯木各賞銀二百兩一等侍衛巴雅斯

呼朗阿雅勒虎宰桑托音瑪木特各賞銀一百五十兩宰桑齊默得庫賞銀一百二十兩管旗章京各賞銀一百兩副管旗章京各賞銀八十兩閤散宰桑各賞銀四十兩僕人各賞銀十兩宰桑策伯克等僕人亦各賞銀十兩扎薩克台吉阿卜達什前派出兵曾賞給銀兩今來朝覲著再加恩賞銀五百兩

乙未

命封授準噶爾台吉宰桑等爵秩有差

上諭軍機大臣曰此次前來朝覲之準噶爾台吉宰桑等阿克把集賽宰桑策伯克巴爾達穆特鄂拓克宰桑博什輝特宰桑烏魯木俱著授為散秩大臣達什達瓦宰桑巴雅斯呼朗阿雅勒虎授為一等侍衛已經降旨其葉克明安台吉巴桑和碩特台吉塞卜騰著封為公呼爾瑞台吉洪郭爾和碩特台吉三濟特著授為一等扎薩克台吉和碩特

台吉特默齊巴爾濟達克巴著授為閒散扎薩克
並將伊等授為扎薩克及所屬編次旗分佐領之
處該部察例具奏庫圖齊訥爾鄂拓克宰桑托音
管理伯得爾格鄂拓克回人之宰桑瑪木特俱著
授為三品總管阿勒巴齊宰桑齊默得庫著授為
四品總管策伯克博什烏魯木托音瑪木特齊默
得庫仍管各鄂拓克巴雅斯呼朗著兼管翼領協
助布林管理達什達瓦所屬各台吉宰桑等受朕

深思其董率所屬各勤教養永圖生聚毋負朕加
恩體卹之意

命賞給西北兩路官兵軍裝銀兩

上諭軍機大臣曰朕命西北兩路官兵擒勦阿睦爾
撒納從前業經賞給整辦銀兩此次並無加給之
例但時屆隆冬且疾驅前進著加恩照從前進兵
之例減半賞給

命授奇徹布為二等侍衛

上諭軍機大臣曰奇徹布被圍於色沁人衆奮身殺賊突圍而出勇敢可嘉著加恩授為二等侍衛并賞銀一百兩

訓飭協辦陝甘總督劉統勳叅贊大臣策楞

上諭軍機大臣曰據署提督冶大雄奏劉統勳策楞檄調安西官兵援勦復行撤回等語劉統勳等從前之張皇失措於此益見阿睦爾撒納從北路竄逸豈有飛越西路為患之理該協督等聽信永常

惟怯之辭輒遠從內地調兵援勦不思兵行全資
馬力今忽而徵發忽而撤回不惟驚惑視聽使甘
肅內地一帶妄生疑議即以馬力而論亦何堪此
往來紛擾耶總之此事皆由永常怯懦但思退守
哈密以為自衛之計又不欲出諸已口故爾張大
其辭而劉統勳等遂為喋喋陳奏耳策楞前獲罪
戾未經正法今復棄瑕任用伊應感激報効何竟
遇事毫無所見若此劉統勳雖未嫻軍旅然於軍

機重務亦宜審察確實初不意其茫無定識至斯也著傳諭劉統勳策楞令將永常如何用言聳動伊等伊等如何遽然聽信之處據實奏聞不得稍涉粉飾

丙申

命叅贊大臣策楞領兵策應諾爾布林沁

上諭軍機大臣曰據永常奏稱諾爾布林沁聚集兵丁擊敗阿巴噶斯之衆擒其得木齊班咱解送前

來扎那噶爾布復來歸附又布庫努特之得木齊
諾爾布亦率屬來歸等語諾爾布林沁等如此効
力而永常尚不出兵接應且以馬力疲乏為辭實
屬怯懦之至著傳諭策楞諾爾布林沁尚在幼年
即能如此奮勇著加恩封為郡王策楞即於現在
兵丁內選派千餘名疾速帶領前進策應諾爾布
林沁仍傳旨獎諭諾爾布林沁並告以伊父噶爾
藏多爾濟朝夕即至今其整頓兵力會合邁行協

助將軍班第等勦除逆亂所擒之得木齊班咱即由臺站解送至京仍慰諭扎那噶爾布令其堅心內附以受朕恩并偵探班第等信息速為奏聞

命革協辦陝甘總督劉統勳職等解來京治罪

上諭大學士曰劉統勳奏西路實在情形一摺乖謬已極現今伊犁平定之後阿睦爾撒納背恩叛竄阿巴噶斯哈丹弟兄不過一鄂拓克之宰桑為所煽誘搶奪臺站葉克明安宰桑扎木叅等率眾求

請於附近軍營居住而永常妄生疑懼遂退回巴里坤今噶爾藏多爾濟之子諾爾布林沁即帶兵千餘殺退阿巴噶斯兵衆則西路全勢並無絲毫變動若使永常仍駐木壘率來歸之衆令為前驅奮往直前早通伊犁聲息而追尋阿睦爾撒納遁逃踪跡西陲當已安帖無事矣乃永常恇怯於前劉統勳附和於後實出情理之外軍營所恃全在領兵大臣今一將軍一總督無端自相恐怖衆心

其何所恃耶劉統勳奏內所云諾爾布林沁等來告之說俱未可深信夫諾爾布林沁為守護游牧始則懇求內移繼則率衆勦賊現將阿巴噶斯之得木齊班咱擒送來營情形若此尚何不可信之有又云內外之界不可不分試思各部自歸誠以來悉已隸我版圖伊犁皆我界尚何內外之可分今西路諸台吉宰桑皆知遣人來告軍營求以兵力壯其聲勢其自効之意顯然可見而永常劉統

勲乃望風疑畏甚欲全調陝甘滿漢軍營馬匹且以向年巴里坤孤懸塞外馬駝被劫為詞夫雍正年間準噶爾以其全力鷓張鼠竊視今日之一舉蕩平諸部歸誠相去天壤三尺童子莫不知之劉統勲作此種種乖謬之語貽悞軍事且班第等在伊犁係辦理軍務大臣劉統勲並不與永常亟謀安接臺站竟奏請退回哈密而置班第等於不問伊身為總督現在巴里坤一切軍營應辦事宜何

莫非其專責即如軍營馬匹現俱乏弱縱撤回之馬不無疲瘦而所有一切馬匹何以不豫飭養膳壯劉統勳所司何事糜費錢糧不能適用其罪尤無可逭昨據冶大雄奏到伊將安西官兵忽而調遣忽而停止馬匹豈不更加疲乏永常已降旨革職掣解來京劉統勳如此乖張貽誤軍旅重務若以其係漢人為之寬恕而不治以應得之罪則是朕岐視滿漢且將復何以用人何以集事耶劉

統勳著革職拏解來京治罪伊子劉墉亦著革職
拏交刑部永常子額爾登額著革職在軍營効力
永常劉統勳在京諸子並著拏交刑部所有各本
旗籍及任所貲財並著查出為償補軍需馬匹之
用

命直隸總督方觀承辦理陝甘總督事務


上諭大學士曰陝甘總督大學士黃廷桂尚未來京
現在軍營有應辦糧馬事務著方觀承馳驛前往

辦理

命叅贊大臣哈達哈等查辦扎木叅等游牧事宜

上諭軍機大臣曰現在審訊扎木叅係與阿睦爾撒
納同黨已將伊治罪著傳諭哈達哈等查伊妻子
及所屬宰桑等嚴行拘管其從前賞賚物件俱追
入官所有戶口牲隻什物著查出賞給齊木庫爾
再前曾降旨令將班珠爾等之戶口牲隻賞給此
次効力之喀爾喀王公大臣等今訊其宰桑禪宗

並未同謀已加恩將禪宗父子釋放所有戶口牲
隻並著停其賞給仍交與辦理伊等游牧之大臣
等暫行安插禪宗並著賞銀一百兩
命授頭等侍衛阿雅勒虎為散秩大臣



平定準噶爾方略正編卷十八